

# JEDAN GRAD, JEDNA BORBA

Piše ko zna, smije i umije; izlazi kad treba i mora; štampa se u kućnoj radinosti.

## ZAŠTO U SARAJEVU NEMA VODE?

Niskih temperatura bilo je i prije pa grad nije ostajao bez vode.

- **Vodovod je potpuno zapušten – novca nema čak ni za redovno održavanje vodovodne infrastrukture.**
- **A za njegovu rekonstrukciju najbogatiji kanton u budžetu 2017. predviđa 1.000 (hiljadu) KM!!!**

## ZAŠTO NEMA NOVCA ZA VODOVOD?

Uzrok nije besparica. Kanton Sarajevo je po vlastitom zakonu obavezan redovno izmirivati gubitke komunalnih preduzeća. Kanton to i čini – ali samo za preduzeća koja smatra prioritetom:

- **Godine 2016. Pokop od Kantona dobija oko 4.2 miliona KM – 14 puta više nego Vodovod.**

## DA LI JE RANIJE BILO NOVCA ZA VODOVOD?

Premijer Elmedin Konaković koristi svaku priliku da izjavi kako prije njegove vlade, „punih 16 godina u vodovodnu mrežu niko zavrnuo ni šaraf” tj. uložio ni marku.

Dokumenti govore drugačije:

- Od 2000. do 2009. u vodovodnu i kanalizacionu infrastrukturu, kojom upravlja Vodovod, uloženo je ukupno blizu 60 miliona maraka, koje su obezbijedili međunarodni donatori, općine i Kanton.
- Od 2008. godine ulaže se novac od vodnih naknada u Federaciji BiH – namjenska sredstva koja se smiju trošiti samo na vodovodnu i kanalizacionu infrastrukturu.
- Do 2013. u okviru redovnih i obaveznih budžetskih subvencija komunalnim preduzećima, Vodovod godišnje od Kantona dobija **prosječno 6 miliona KM.**

## ZA ŠTA IMA PARA?

U budžetu za 2017. novca se našlo – ali za izgradnju novog vodovoda apartmanskom naselju na Bjelašnici!

Vikendaši u tih 400 apartmana, mahom tranzicijska elita, ne troše toliko vode da bi ugrozili snabdijevanje grada. Najekonomičnije bi bilo vodu iz gradskog vodovoda pumpati i, zbog tih troškova, bogatim vlasnicima apartmana naplaćivati po višoj cijeni od cijene vode u gradu. Vlada KS međutim, s blagoslovom Skupštine, gradi potpuno nov vodovod koji će elitu na odmoru napojiti kristalno čistom, izvorskom vodom iz Bijele Rijeke za bijednih **2 MILIONA KM**, odnosno **5.000 KM po jednom apartmanu**. Ali to je projekat za dobro svih nas:

- **Da nam se ugledni zvaničnici, eksperti i menadžeri ne potruju fekalijama – koje u gradski vodovod stižu baš iz njihovih apartmana na Bjelašnici.**

**Od 2013. godine, kada je formirana nova skupštinska većina na čelu sa SDA, davanja se drastično smanjuju:**

1,5 milion 2013. godine  
250.000 KM 2014. godine  
212.500 KM 2015. godine  
300.000 KM 2016. godine  
431.000 KM 2017. godine

- **Dramatične uštede vrijede samo za Vodovod.**
- **Subvencije za ostala javna komunalna preduzeća uglavnom su nepromijenjene.**

## ZA KOGA U SARAJEVU IMA VODE?

Vode u Sarajevu ima za koncesije privatnicima. Crpeći zajednički prirodni resurs, privatnici se bogate, a koncesije ne plaćaju. Među dužnicima je i jedna od najbogatijih multinacionalnih kompanija – Coca-Cola.

**Od 19 koncesija za vodu, za 14 NE POSTOJE koncesioni ugovori.**

## VODOVOD ZA BOGATE I VODOVOD ZA SIROMAŠNE

U općini Centar hvale se da će ove godine konačno dovršiti vodovod za Nahorevo. Ne pominju da je to i vodovod za POLJINE. Lako bi se problemi vodosnabdijevanja Nahoreva riješili i iz gradskog vodovoda, ali rezidencije na POLJINAMA zaslužuju – privatni vodovod.

**Ono što je dobro za grad Sarajevo – nije dobro za političke lidere i njihove satelite: npr. nije dobra voda s Bačeva obogaćena fekalijama iz bjelašničkih apartmana istih tih uglednika.**

# KO JE KRIV ŠTO JE SARAJEVO BEZ VODE?

Premijer Konaković se, i u ovom slučaju, nastoji proglasiti nenadležnim, iako:

1. on 2014. godine, kao poslanik SDA, predvodi Skupštinsku većinu koja odbija kredit Evropske razvojne banke za rekonstrukciju vodovodne mreže
2. on, kao poslanik SDA, predvodi Skupštinsku većinu koja reže budžetska davanja Vodovodu
3. on, kao kantonalni premijer, postavlja za direktora Vodovoda nekadašnjeg inkasanta a svog kolegu-diplomca DIF-a, čovjeka bez dana rukovodilačkog iskustva

4. on, kao kantonalni premijer, nema nijedne primjedbe na zadnji izvještaj Vodovoda, dok njegov kolega iz SDA, poslanik Mešanović, tom prilikom u Skupštini recituje hvalospjev novoj upravi.

→ **Javna preduzeća NE MOGU poslovati bez kontrole vlasti.**

→ **Svi izvještaji idu na usvajanje u Skupštinu kantona.**

→ **Sva zapošljavanja i naimenovanja, sve planove i izdatke – kontrolišu i odobravaju vlada i skupština**

## Epilog: Javno-privatno partnerstvo za Vodovod – iz javnih para za privatni profit

Priča počinje uvijek isto. Na početku bude preduzeće u državnoj svojini. Preduzeće se godinama slabi – pljačkom, zapošljavanjem nestručnjaka, namještenim tenderima i sl. I tako se preduzeće dovede na rub propasti.

Tako su budzašto rasprodate i naše fabrike, te pretvorene u unosne (građevinske) lokacije.

Za komunalna preduzeća recept je nešto drugačiji; zove se javno-privatno partnerstvo. Vlasti, potpomognute stranim i domaćim ekspertima koje plaćaju MMF i Svjetska banka, proglašavaju državu (dakle – i sebe!) lošim gazdom, koji više ni nema novca za ulaganja. Traži se privatni investitor, što je najčešće kamuflaža za kapital iz stranačkih klanova koji su ta preduzeća i rasturili.

Privatniku se za male pare proda dovoljno dionica za kontrolu nad preduzećem. Država na sebe preuzme da krpi dugove. Privatnik probere djelatnosti ili usluge koje će mu donijeti profit, ili naprosto podigne cijene.

Privatnik pozitivno posluje tj. bogati se. Država našim parama plaća us-

luge ili radove od javnog interesa, tj. ono što je društvu neophodno da bi funkcionisalo – a privatniku se ne bi isplatilo.

**Javno-privatno partnerstvo  
=  
sav profit privatniku, sav teret –  
društvu**

Premijer Konaković sad priprema teren da se u Sarajevu, iscrpljenom redukcijama vode, pojavi kao vitez na bijelom konju. Od Vodovoda i kanalizacije, korupcije, nesposobnjakovića – spasiće nas privatni investitor! Svi će jedva dočekati – kako ne bi da smo redovno i neometano imali vode, iako privatizacija vodosnabdijevanja nigdje u svijetu nije rezultirala boljim uslugama, naprotiv.

Kontrolu nad životno važnim prirodnim resursom, koji nam svima pripada, prepustit će privatniku, vjerovatno nekom iz klanova koji su nas i uništili. Oni koji godinama ruše sve što je ovo društvo stvorilo imat će siguran izvor prihoda od sada pa do vječnosti, jer bez vode se ne može, plaćat ćemo je taman krepavali od gladi.

## ZNAMO LI KAKVU VODU PIJEMO?

Ne znamo.

Zavod za javno zdravstvo radi tek oko 12% broja analiza na koji ih obavezuje zakon. Svakodnevne redukcije uzrokuju promjene pritiska u cijevima radi čega u cijevi dospijeva sve što se nađe u okolnom terenu, od obične zemlje do kanalizacije i teških metala. A i dalje se uporno radi na smanjenju ionako slabo zaštićene vodozaštitne zone.

Na Bjelašnici je izgrađeno 400 apartmana; tamo se i dalje gradi iako s Bjelašnice sve vode, pa i otpadne, kroz nekoliko dana završe u našim slavinama. Sa svim virusima i drugim mikrobima na koje HLOR NE DJELUJE.

Apartmani su inače napravljeni protivno stručnim nalazima (još iz vremena Olimpijade) i to bez okolinske dozvole – bespravno, dakle. Bespravno a i aljkavo, pa se iz javnog novca moralo potrošiti dodatnih 7 MILIONA KM da se sanira kanalizacija. Rezultat:

**VODE VRELA BOSNE I DALJE SU ZATROVANE FEKALNIM BAKTERIJAMA. ŽIVJELI!**